

geringe verworffen / vnd nicht geacht wirdt / da doch die Natur all ihr Wesen in Schlechtheit verrichtet / man muß sich derowegen nicht daran kehren / vnd ein Ding gering achten / weilen es nicht bekant vnd groß ist.

Die Juden ärgerten sich auch an Christo / weilen Er so ärmlich gebohren vnd gering lebete / welcher doch alles in allem wahr / sie sahen vnd merckten wol / daß Er solche Zeichen vnd Wunder thäte / welche kein anderer / als der verheißene Messias thun konte / dannoch blieben sie bey ihrer Halsstarrigkeit beharlich / nur darumb / weil seine Gestalt so verächtlich wahr / vnd so Er nit menschliche Natur / vnd eine geringe Gestalt hätte an sich genommen / so hätte Er vnser Mittler vnd Versühner zwischen Gott nit seyn können / dann durch den Fall Adams waren wir gang von Gott gescheiden / also daß wir in Sünden verhartet / vnd der Hölle vnd Todte gang ergeben / weilen der Geist Gottes von vns gewichen / allzeit hätten verbleiben müssen. Da aber das süsse Manna vnd liebliche Thaw / von oben herab auff vnser truckene Herzen fiel / solche mit seinem Gnadenreichen Wort / vnd vergießung seines thewren Bluts erquickete vnd befeuchtete / also balden wurden wir wiederumb bequem den Geist Gottes zu empfangen / welches vns zu vorn unmöglich wahr. Also siehet man klärlich / daß durch den Allerverachtesten vnser Versöhnung geschehen muste.

Gleich wie nun die vbel. gelehrte Phariseer vnd